

दिनांक 12.12.2025

समय: 18.45 बजे

आकाशवाणी जयपुर—अजमेर  
प्रादेशिक समाचार

- राज्य री मौजूदा सरकार रा कामकाज रा दो साल पूरा व्हेवण परां मुख्यमंत्री भजनलाल शर्मा सरकार री उपलब्धियां रो बखान कीनो—70 फीसदी वायदा पूरा व्हेवण रो दावो कीनों
- मुख्यमंत्री भजनलाल शर्मा 333 स्टार्टअप्स ने 10 करोड़ 79 लाख रुपया री फंडिंग दीनीं
- केन्द्रीय मंत्रिमंडल साल 2027 मांय व्हेवण वाळी जनगणना सारू 11 हजार 718 करोड़ रुपया रो बजट मंजूर कीनों

अर

- केन्द्र सरकार संसद मांय कह्यो —लारला दस साल मांय देश मांय साखां री उपज मांय 44 फीसदी री बधोतरी व्हीं

000

मुख्यमंत्री भजन लाल शर्मा कह्यो है के राज्य री मौजूदा सरकार प्रदेश री दिशा अर दशा बदलण री ठोस सरूआत कीनी हैं वे आज जयपुर मांय खबरनवीसां ने वां रा राज रा दो साल रा कामकाज रा बारा मांय विगतवार जाणकारी दे रह्या हां मुख्यमंत्री कह्यो के वां री सरकार जनता री उम्मीदां माथे खरी उतरण हर संभव कोशिश कर रही हैं श्री शर्मा कह्यो के विधानसभा चुनाव ऊं पैली भारतीय जनता पार्टी री ओर ऊं जारी करी ज्या संकल्प पत्र मांय करी ज्या वायदां मांय ऊं 70 फीसदी पूरा व्हे गया है या वां माथे काम चाल रह्यो हैं मुख्यमंत्री कह्यो के केंद्र री केई योजनावां ने लागू करण मांय राजस्थान अब्बल या दूजा पायदान माथे हैं मुख्यमंत्री कह्यो के पेपरलीक अर भ्रष्टाचार रे खिलाफ सरकार असरदार कार्रवाई कीनीं वे कह्यो के नौजवानां रो भविष्य सुरक्षित करण माथे सरकार रो खास ध्यान हैं मुख्यमंत्री लारला दो साल मांय प्रदेश रा बुनियादी ढांचा, निवेश अर उद्योगां ने बधावो देवण सारू करी ज्या कामां री विगतवार जाणकारी दीनीं

.....

दूजी कानी कांग्रेस प्रदेश री भजन लाल सरकार रा कामकाज ने नाकाम बतायों विधानसभा मांय विपक्ष रा नेता टीकाराम जूली कह्यो के सरकार नौजवानां ने नौकरी देवण ने सब ऊं मोटी उपलब्धि माने है, पण हाल ताई ज्यां नौजवानं ने नौकरी दीरीजी, वां सारू रिक्तियां लारली कांग्रेस सरकार ई निकाली हीं वे राज्य मांय कानून व्यवस्था अर सरकार री माली हालत माथे ई असंतोष जतायों

.....

000

मुख्यमंत्री भजनलाल शर्मा वां रा राज रा दो साल पूरा व्हेवण रा सिलसिला मांय जयपुर मांय राख्यी ज्या नवाचार दिवस—स्टार्टअप कॉन्क्लेव मांय चुण्यी ज्या 333 स्टार्टअप्स ने 10 करोड़ 79 लाख रुपया री रकम दीनीं ई मौके वे कह्यो के नवाचार ही माली व्यवस्था अर समाज रा विकास रा इंजिन हैं वे बतायो के राज्य मांय आईस्टार्ट माथे 7 हजार 200 ऊं बत्ता स्टार्टअप नाम मंडा लीना है, ज्यां मांय ऊं 2 हजार 600 ऊं बत्ता स्टार्टअप महिलावां री अगुवाई मांय चाल रह्या हैं ई मौके मुख्यमंत्री राजस्थान डिजिफेस्ट—2026 रा टीजर अर हैकैथॉन री ई सरूआत कीनी, ज्यीं सारू बजट मांय 15 करोड़ रुपया रो प्रावधान करी ज्यो हैं

वे नौजवानां ऊं नवाचार रा हलकां मांय आगे बध र प्रदेश ने दुनिया मांय अगाड़ी बणावण री अपील कीनीं

.....

000

मुख्यमंत्री भजनलाल शर्मा राज्य सरकार री उपलब्धियां री जाणकारी जनता ने देवण सारू आज जयपुर ऊं 50 विकास रथ जिलां सारू रवाना कीनां ई सागे ई प्रदेश रा जिला मुख्यालयां ऊं जिलां रा प्रभारी मंत्री ई डोढ़ सौ रथ रवाना कीनां नगरीय विकास मंत्री झाबर सिंह खर्वा पाली मांय, जल संसाधन मंत्री सुरेश सिंह रावत भरतपुर मांय, जनजाति क्षेत्र विकास मंत्री बाबूलाल खराड़ी बांसवाड़ा मांय अर गृह राज्यमंत्री जवाहर सिंह बेढ़म करौली मांय प्रचार रथ रवाना कीनां अ प्रचार रथ प्रदेश रा सगळा 200 विधानसभा हलकां मांय सरकार री दो साल री उपलब्धियां, जनता रा भला री योजनावां अर नीतिगत सुधारां री जाणकारी जनता ने देवेलां

000

निर्वाचन आयोग वोटर लिस्टां रा विशेष गहन पुनरीक्षण री निगराणी सारू प्रदेश मांय खास सूची प्रेक्षक तैनात कीनो हैं मुख्य निर्वाचन अधिकारी नवीन महाजन बतायो के श्रीमती रोहिणी भाजीभाकरे ने आ जिम्मेदारी दीरीजी हैं विशेष सूची प्रेक्षक पुनरीक्षण प्रक्रिया री साफगोई तैय करेलां वे फरवरी 2026 मांय आखिरी सूची छपण ताई राज्य मांय मौजूद रेहवेलां आयोग राजस्थान अर सात और राज्यां मांय ई विशेष प्रेक्षक लगाया हैं

000

राजस्थान राज्य ग्रामीण आजीविका विकास परिषद—राजीविका री ओर ऊं गांवाई हलकां मांय महिलावां री माली मजबूती सारू एक महीना ताई चालण वाळा खास अभियान 'मिशन समृद्ध दीदी' री सरूआत करी ज्यी हैं ग्रामीण विकास मंत्रालय री संयुक्त सचिव स्मृति शरण इण रो उदघाटन कीनों ई अभियान रो मकसद खुद सेवक समूहां री महिलावां ने बैंकां टेमसर बैंक कर्ज मुहैया करावणो, वां रा कारोबार ने बधावो देवण अर गांवाई हलकां मांय डिजिटल वित्तीय समावेशन ने मजबूत करणो हैं

000

केन्द्रीय मंत्रिमंडल साल 2027 मांय व्हेवण वाळी जनगणना सारू 11 हजार 718 करोड़ रुपया रो बजट मंजूर कीनो हैं सूचना अर प्रसारण मंत्री अश्विनी वैष्णव आज नई दिल्ली मांय व्ही मंत्रिमण्डल री मीटिंग पाछे खबरनवीसां ने आ जाणकारी दीनीं वे बतायो के देश री 16वीं अर आजादी पाछे री 8वीं जनगणना दो दौर मांय कराई जावेलां श्री वैष्णव कहयो के ई रा तैत जातिगत गणना ई करायी जावेलां मंत्री कहयो के आ पहली डिजिटल जनगणना व्हेला, ज्यीं रा तैत एंज़ॉइड अर आई ओ एस मोबाइल एप्लिकेशन रे ज़रिये जाणकारियां भेळी करी जावेलां वे बतायो के जनगणना रा काम मांय तीस लाख कर्मचारियां ने लगाया जावेलां

.....

जनगणना 2027 रा तैत जनगणना कर्मी हर घर ताई पूगोलां श्री वैष्णव ने बतायो के मंत्रिमंडल कोयला संपर्क नीति – कोल सेतु मांय सुधार री मंजूरी ई दे दीनीं

000

देश मांय लारला दस साल मांय साखां री उपज मांय 44 फीसदी री बधोतरी व्ही हैं केंद्रीय कृषि अर किसान कल्याण मंत्री शिवराज सिंह चौहान आज राज्यसभा मांय प्रश्नकाल रे दौरान पूरक सवालां रा जवाब मांय आ जाणकारी दीनीं श्री चौहान कहयो के मोदी सरकार किसानां ने दो लाख करोड़ रुपया री खाद सब्सिडी दे रही है अर प्रधानमंत्री किसान सम्मान निधि रा तैत हाल ताई चार लाख करोड़ रुपया ऊं बत्ती रकम किसानां रा खाता मांय भेजी जा चुकी हैं

.....

000

केंद्रीय पर्यटन मंत्री गजेन्द्र सिंह शेखावत कहयो है के भारत क्रूज पर्यटन रो नुवो केन्द्र बण रहयो हैं वे कहयो के होटलां अर रेस्तरां री तादाद मांय ध्यानजोग बधोतरी व्ही है अर दुनिया रा मोटा—मोटा

होटल समूह भारत मांय रकम लगा रह्या हैं वे आज नई दिल्ली मांय खबरनवीसां सागे बातचीत कर रह्या हां श्री शेखावत देश मांय बधता सैर-सपाटा मांय वंदे भारत रेलगाड़ी री भूमिका रो जिकर कीनों

.....

000

केंद्र सरकार कानी ऊं देशभर मांय चलाया जा रह्या खास अभियान **आपकी पूँजी-आपका अधिकार** रा तैत आज बारां मांय जिला अग्रणी शाखा री ओर ऊं लगायी ज्या शिविर मांय 1 हजार 211 पिरवारां ने कोई 19 करोड़ रुप्या री बिना दावा वाळी रकम दीरीजीं अक्टूबर ऊं दिसंबर 2025 तांई चलाया जा रह्या ई अभियान रो मकसद लोगां री बरसां ऊं अटक्योडी पूँजी, बीमा दावा अर दूजी माली संपत्तियां ने वां रा असली हकदारां तांई हिफाजत सागे पूगावणो हैं

000

सूचना अर प्रसारण मंत्रालय रा केंद्रीय संचार ब्यूरो री ओर ऊं जालौर मांय लगायी ज्यी दो दिन री मल्टीमीडिया प्रदर्शनी आज पूरी व्हीं ई मौके जिला विधिक सेवा प्राधिकरण रा सचिव, अहसान अहमद राष्ट्रगीत वंदे मातरम् रा डोढ़ सौ साल पूरा व्हेवण रा सिलसिला मांय मुफ्त कानूनी मदद अर विधिक सेवावां रा बारा मांय जाणकारी दीरीजीं ई दौरान योग, जैविक खेती, साइबर हिफाजत अर वित्तीय साक्षरता सरीखा मुद्दां माथे ई चर्चा करी ज्यीं

000

विकास अध्ययन संस्थान जयपुर मांय **'विकसित राजस्थान और विकसित भारत/2047'** मुद्दा माथे दो दिन रो अंतर्राष्ट्रीय सम्मेलन आज सरू व्ह्यो इण रा उद्घाटन सत्र मांय संस्थान रा शासी मंडल रा अध्यक्ष डॉ. अरविंद मायाराम देश रा विकास मांय प्रवासी भारतीयों री खास भूमिका माथे ज़ोर दीनों आई.डी.एस. रा कार्यवाहक निदेशक प्रो. संजय लोढ़ा प्रवासी भारतीय दिवस रा ऐतिहासिक महत्त्व माथे ज़ोर दीनों

000